

<County: Lancashire>

<Code: L0442>

<MS reference: London, Public Record Office E40/5631>

<Text: Assignment>

This endentur~ made be-twene william Danyell of dersbury onn þe tonn side & John of stanley knyght onn þe tother side beres witnes þ^t
 þe forsaide william has geue & grantet to þe forsaide Johnn þe ward & þe kepyng~ of all þe londes & tenement³ w^t her appurtynaunce
 þe quich wer~ sum tyme Nicholas þe Norres of halsnade þe quich londes & tenement³ he held in chefe of þe forsaide William in halsnade w^t-Jn
 þe parechn of prestecote And þe quich after þe deth^e of þe said Nicholas be resoun of tender age of Thomas þe sonn of Thomas of Wetherby cosyn
 & heyr~ to þe forsaide Nicholas þ^t is to wete sonn to Jonet suster to Nicholas fell to þe handes of þe forsaide . William to haue & to hold þe forsaide
 ward & kepyng w^t her appurtynaunce vn-to þe full age of þe forsaide Thomas w^t þe mariage of þe forsaide Thomas w^touten <ill><2 words></ill>
 or anny other wast makyn in londes & tenement³ and also þe forsaide Johnn schall pay 3erly to þe forsaide william hes heyres or hes assignes
 deurant þe nownage of þe forsaide Thomas þe chefe rent of halsnade þ^t is to wete vj d ob~ at þe termes be-for~ this tymes vsuelis
 and in case þ^t þe forsaide Thomas dey w^t-Jn age þe forsaide William grauntes to þe forsaide Johnn & his heires þe ward & þe mariage
 of his heir~ if anny be w^t-Jn age & so fro heir~ to heir~ till one heir~ be at full elde And aur~ þ^t þe forsaide Johnn grauntes onn his partie
 to pay for þe forsaide ward & mariage to þe forsaide william his heires his assectures or his Assignes x li of syluer þ^t is to wete
 iiij marke in hond iiij marke at þe fest of 3ole next seuyng~ þe date . of these .iiij mark at þe fest of saynt Johnn þe Baptist then next
 seuyng & xl s~ at þe fest of 3ole then next seuyng~ after þe effecte & þe purporte of sertayn obligaciouns or statute marchandes
 oppoun thes endentures & payment³ made in þe quich þe forsaide Johnn & sufficiant frendes of his schuld be bounden fo þe said
 payment³ & conandes trewly to be halden Jn witnes of queche thyng~ to thes conandes on bothe þe sides to be halden & parfournmet



þe said parties to þe parties of thes endentures haue set to her seall made in presens of herry norres
knyght william off
Jrlond Henr~ Blundell Richard Trauers Johnn of Fasakyrley Richard of þe Crosse & other þe
Thursday next after þe fest of
þe Natyuyte of Sayent Johnn þe Baptist þe 3er~ of þe regne of kyng henr~ þe fift after þe conquest þe
x^e & if so be þ^t þer be any thyng
to be amendet w^tIn these endentures þ^t longes to traethe or~ consienns hit for to be amendit be þe
auyse & þe ordynaunce of
Johnn Sauage knyght be assent of bothe þe parties .